

recoñecer a variedade que a distingue, orgaizándose según os principios do bó federalismo. E para esa mudanza de réxime ningún povo sería tan firme como Galiza.

VI

Con esta xa van alá sete veces que paso por Río de Xaneiro. Os monstros xeolóxicos que gardan a bahía son os mesmos de sempre, pero de cada vez que os vexo semellan outros. Tamén as ideas máis firmes toman o tinte das novas circunstancias. Fai un ano nada máis que pasei por eiquí, en dereitura de Franza, para incorporarme ao goberno estraterritorial da República Hespañola, e agora retorno a Bos Aires, pol-o mesmo camiño, no mesmo trasatlántico e cangado coas mesmas ideas que levei; pero ¡qué distintas se me representan! Porqué agora comprendo mellor que nunca o desinio suicida dos hespañoes e o falso liberalismo dos seus repúblicos. E hoxe non teño mellor luz que a que me ven do instinto galego.

A min paréceme que a futura política de Hespaña terá de sair de Galiza para que sexa salvadora, porque ben ás claras se ve que o orde imposto pol-a forza dende Madrid, sóio asegura unha paz preñada de tempestades, como sabemos que os privilexios económicos de calisquera povo de Hespaña non son mellores que a hexemonía política de Castela, cando se trata de acadar un orde supranacional. Díxose moitas veces que a paz nasce do orde; pero agora é corrente decir que a única fórmula san e duradeira da democracia é a que nasce d-unha paz lograda dende abaixo e pol-a virtude do federalismo. E como Galiza é un povo antigo eisento de egoísmos, con él terá de contarse para salvar a Hespaña. Porque todo se lle pode negar a Galiza, menos a sua cordura, o seu anxeio autonómico ea súa vontade federalista.

Non falaremos da vida que levou a nosa Patria dende os Reis Católicos até a división provincial do 1833, pol-a que se suprimiu a "Xunta Suprema do Reino de Galiza", que viña cordinando a xestión administrativa das vellas provincias e simbolizando a unidade galega. Tampouco falaremos do rexurdimiento iniciado no noso país pol-os seus grandes fillos do século XVIII: Sarmiento, Feixóo, Cornide, Cernadas e outros máis. Daremos de lado, inclusive, á laboura reconstrutiva dos

anos do *Fomento*, que provocou intres de verdadeiro galeguismo, cando, na guerra de Independencia, Galiza se sinteu libre e dona de sí. Falaremos somentes d-alguns feitos acaecidos a partir dos primeiros anos do século XIX, co que abondará para poñer de bulto a vontade autonomista e federal de Galiza, endexamáis adormecida. En 1808, durante a invasión napoleónica, firmouse na Cruña un tratado de Federación perdurable entre Galiza e Castela, como primeiro paso dun propósito máis ambicioso, concebido pol-a nosa Xunta Suprema. O Conde Toreno e Pi Margall recolleron o feito; pero ninguén d-eles dixo que n-aquela Federación entraban as provincias do Norte de Portugal e as de Oviedo e León, co que se pretendía restaurar a Galiza dos tempos románs, ampliándose dispois co ingreso voluntario dos demais povos de Hespaña, a medida que se fosen liberando dos franceses. Galiza, pois, concebeu e tiña a meio realizar a Federación dos povos peninsulares, moito antes de que en Hespaña aparecieran os teóricos do federalismos, influídos por Proudhon. Aínda será ben lembrar o "Pacto galaico-asturián", celebrado na Cruña con extraordinaria pompa, en 1869, de cuio alborozo quedou a "Rúa do pacto Federal", que n-aquela cibdade se conmemoraba. En moitisimas oportunidades se revelou en Galiza unha indicisión amorosa entre Castela e Portugal, sempre por motivos de diñidade ofendida. Pero a insufrible tiranía de Fernando VII produxo no noso país, xa non dúbida amorosa, senón o franco desexo de arredarse de Hespaña para ingresar en Portugal. N-un importante libro, escrito por Lord Carnarvon, en 1827, recóllese o feito de que os constitucionalistas galegos pedían a Deus que Galiza entrase canto antes en Portugal. "Os galegos —di Carnarvon— estaban desexosos de trocaren unha grande e antiga monarquía por outra máis pequena e comparativamente insignificante", con tal de que poideran participar das ventaxas d-un réxime constitucional. Esta idea botou raíces no ánimo galego e resucita en intres desesperados, cando en Portugal hai máis liberdade que en Hespaña.

No Boletín do 6º Corpo do Exército (Lugo, 1811) acusábase a existencia d-un "*cierto provincialismo*" galego, e non se pode negar o sentimento de nacionalidade que caracterizou a renascencia literaria de Galiza, iniciada en 1837. Mentras Nicomedes Pastor Díaz descubría, co seu "espírito europeo", as maravillosas posibilidades do noso idioma, Neira Mosquera

atopaba o sentido histórico da nosa vida. Así ocorreu que nas páxinas da revista *El Recreo Compostelano*, aparecida en 1842, xa se botaban as bases do rexionalismo galego, de tan convincente maneira, que, en 1843, fíxose posible que a *Xunta Central de Galiza*, reunida en Lugo, puxese a votación a procedencia de discutir "*si debía ou non este antigo Reino declararse independente*", cuia proposta, presentada por Faraldo, perdeu por un só voto de diferenza. N-este feito revélase o espírito revolucionario e independentista dos galegos de 1843.

En 1845 empezou a publicarse en Compostela o periódico *El Porvenir*, "órgao da mocidade galega", románticamente liberal, no que os seus redatores se doían de non poderen declarar en lingoaxe intelixible "a fórmula que ensine aos galegos todo o que necesitan coñecer", porque "hai frases que serían unha sentenza de morte para os seus autores". Tal era o silencio que o Goberno ditatorial de 1845 impoñía as tendencias liberaes e democráticas; pero aínda así, aqueles mozos arriscáronse a publicaren frases como éstas: "non queremos ser máis que galegos", engadindo que o espírito que os animaba era "o grito de Varsovia contra os rusos de Madrid".

O clima de hostilidade contra os gobernos centralistas dou lugar á revolución galega de 1846, considerada como a única de esencia rexional. No manifesto da Xunta Revolucionaria, escrito por Faraldo e publicado no periódico *La Revolución*, decíase que Galiza, ensumida no oprobio e convertida en colonia da corte madrileña, "vai erguerse da súa homillación e abatimento", rematando coas seguintes verbas: "Que a espada de Galiza faga inclinar unha soa vez a balanza en que se pesan os destínos de Hespaña." Ben sabido está que aquel movemento rexionalista fracasou por xungirse a unha subversión militar (alentada por un príncipe da casa reinante) que acabou en traxedia cos fusilamentos de Carral.

Na primavera de 1856, xa renascidas as esperanzas galegas, dispois da fracasada revolución, celebrouse o famoso banquete de Conxo, no que os estudantes e artesáns de Sant-Iago se axuntaron e abrazados como representantes do traballo e a intelixencia, baixo as frondas d-unha carballeira cercada por soldados e policía. Alí nada ocorreu que xustificase o temor das autoridades; pero foi un dos aitos que maior recordo deixaron en Galiza. Tratábase, simplemente, de buscar na solidariedade de todas as clases sociais de Galiza o trunfo das ideas

que denantes se malograran pol-a trabucada táctica de fiar en pronunciamentos militares. No banquete de Conxo proclamouse de novo a unidade galega, e nada máis; pero nos brindis poéticos de Aguirre e Pondal brilou o anxeio da liberdade e democracia que aínda hoxe alumea o galeguismo.

Xa no 1855 aparecera na Cruña *El Clamor de Galicia*, dirixido por Vicetto, en defensa da nosa persoalidade nacional e dos dereitos que naturalmente nos corresponden; pero semellante ourentación acadou un desenrolo complotado no periódico *El Miño*, fundado en Vigo no ano 1857 e inspirado por Murguía. Será ben anotar que da impresa d-este periódico saíron en 1863 os "Cantares Galegos", de Rosalía, que foron saudados dende Cataluña como un grito de guerra lanzado por Galiza contra Castela. Tamén compre rexistrar que as Hestorias de Murguía e Vicetto foron a base do nacionalismo galego, acusado como tal pol-o académico señor Sánchez Moguel en 1888. En fin: a "custión galega", dispois da "boa nova" de Faraldo, xa convertida por Vicetto e Murguía en ideal patriótico, reforzouse coa labours dos irmáns La Iglesia, que fundaron a "revista universal d-este reino", *Galicia* (1860 a 1866), para aliar o intelectual co político n-unha plea renascencia das nosas letras. E no ano 1861, por iniciativa do patricio López Cortón, celebráronse os primeiros *Xogos Frorales* de Galiza, que nos deixaron de recordo o *Album da Caridade*, nutrida antoloxía dos nosos poetas, en lingua galega e castelán. Compre lembrar a revista *O Vello do Pico Sagro*, toda ela escrita en galego, que empezou a publicarse na Cruña en 1861, e *A Fuliada*, en 1881, coroándose todo este movemento galeguista coa fundación da "Real Academia Galega", e o seu Boletín, que aínda hoxe perduran dende o 1905.

O día 22 de xullo do 1873, a pouco de instaurarse a primeira República, foi celebrada en Sant-Iago, por convocatoria do seu Alcalde, unha Asambleia popular, na que se aprobou por aclamación o seguinte acordo: "Unha vez pranteada en Hespaña a forma republicana federal de goberno, resolvemos exercer o dereito de iniciativa para orgaizar política e adeministrativamente o noso territorio." D-aquela xuntanza cuia aita firmaron quiñentos coarenta e cinco cidadáns, xurdeu un Directorio en constante aitividade, que lanzou un manifesto autonomista ao país galego, recollendo, en información pública, moitas e valiosas adhesións. Tan foi así, que non faltaron

cregos que secundasen o desexo de constituir un Estado galego dentro da Federación hespañola sumándose en calidade de simples cidadáns, xa que como cregos estábanlles prohibido adherirse a unha forma estatal divorciada da Eirexa. Debemos engadir que o Presidente da Asambleia e do Directorio era Sánchez Villamarín, o autor d-un "Plan de Facenda cantonal para Galiza", trazado a raíz da revolución do 1868. Velahí un claro exemplo de concencia política federalista, como non se veu en ningún outro povo de Hespaña.

Tamén realizou Galiza outra demostración única na hestoria política do oitocentos hespañol. Revélase no *Proieito de Constitución ou Pacto Fundamental para o futuro Estado Galego*, que precedu á Constitución Federal aprobada en Zaragoza, cuio proieito foi presentado pol-o "Consello Executivo da Rexión Galega" o día 24 de maio do 1883 e definitivamente discutido, votado e sancionado pol-a "Asambleia Federal do Territorio", reunida en Lugo o día 2 de xullo do 1887. O seu artigo segundo di así: "Esta Rexión eríxese en Estado Autónomo e Soberán, e adopta a forma democrática-republicana federal para o seu goberno... Así mesmo aspira á Confederación Ibérica, e dende logo contrae a obriga de coaduxvar incesantemente para recadar da Nación Portuguesa unha eterna alianza pactada sobor da base do mutuo consentimento e a vontade d-entrambos povos." Non estará de máis reproducir o telegrama que Pi Margall dirixiu aos assembleístas de Lugo: "*Galicia quiso ya durante la guerra con Francia establecer el sistema federal. Pláceme verla ahora ocupada en discutir su futura Constitución. Por el unitarismo van perdiendo todas las regiones su iniciativa, su personalidad y su vida; sólo por la federación cabe salvarlas; trabajemos todos por realizar esta última esperanza de los pueblos.*"

Nin que decir ten que o Ministro galego Eduardo Chao foi un dos redatores do proieito de Constitución Federal da República do 73, coidándoa necesaria para salvar e mellorar a vida económica e social de Galiza, e defendéndoa coa mesma exemplar decisión con que defendeu República (véxase a biografía de Chao, escrita por Curros Enríquez). Deixemos adiantado que tal precedente influíu no ánimo do Ministro galego da segunda República, Casares Quiroga, para que votase dende o "banco azul" a favor do sistema federal nas Cortes constituintes do 1931.

Tense dito moitas veces que o federalismo dou contido doutrinal ao sentimento da galegitude; pero a idea da libre unión dos homes e dos povos está no noso íntimo modo de ser. Lembremos que o libro de Brañas "El Regionalismo", impreso en 1889, foi o primeiro compendio doutrinal do autonomismo galego, cando nin Prat de la Riba nin Sabino de Arana Goiri deran a luz ningún escrito que hoxe se poida citar (según confesión de Cambó, Brañas influíu nas direitrices do movemento catalán). Así foi que cando Pi i Margall visitou Galiza, no outono do 1892, díxolle a Brañas que o seu rexionalismo galego aventaxaba ao federalismo hespañol en que de por sí xa era un sistema político. N-efeito, Brañas esclarecera, mellor que ningún líder federal, a tendencia independentista dos povos hispanos, sentando as bases xustas e posibles d-un Estado armónico para toda Hespaña. Pero Brañas fixera algo máis que escribir un libro: fundara un periódico, *La Patria Gallega*, para difundir os ideais autonomistas; pronunciara discursos e conferencias a oito, dentro e fora de Galiza; e no seu discurso universitario de apertura de curso (1892-93) concretara en dezaseis puntos todo un programa de goberno galego. E todo isto ocurría no mesmo ano en que Cataluña formulaba por primeira vez o seu programa concreto de reivindicacións, por meio das famosas Bases de Manresa.

En 1889 os galegos da Habana editaron *El Regionalismo Gallego*, de Murguía, no que quedou ben sentado que Galiza era unha lexítima nación, con dereito a vivir a súa vida en completa liberdade. Como adhesión á valente doutrina de Murguía, saíu a luz, na mesma cibdade, un documento firmado por máis de mil douscentos emigrados, no que se acusaba ao Estado hespañol de ser un "orgaismo monstruoso", causante de que "os galegos non poidan vivir na súa terra". O lema dos galegos de Cuba era éste: "Sexamos rexionalistas e teremos Patria." Así se comprende que a bandeira azul e branca da nova Galiza ondease por primeira vez no Centro Galego da Habana e que alí se cantase tamén por primeira vez o himno que hoxe todolos galego escoitamos con reverencia.

O anxeio político de liberación tomou novos rumbos a partir da "Liga Galega" do 1897, creada na Cruña para defensa de Galiza, con reglamento escrito en idioma autóctono; si-gueu avante nas campañas de "Solidaridade", nas que se usou a nosa língoa como elemento de propaganda oral i escrita, tendo

como órgano a revista *Galicia Solidaria* (1908-1909), *Solidarismo Gallego* e *Solidaridade Gallega* (1908) e cuio "Catecismo", dirixido aos labregos, era unha incitación ao establecemento d-unha política exclusivamente nosa; afinouse con motivo das Asambleas agrarias de Monforte, do 1910, que abriron anchas luces no problema máis fondo de Galiza; axitouse coas prédicas de Basilio Alvarez, á cabeza de "Aición Galega". Pero se o provincialismo foi substituído pol-o rexionalismo, gracias aos "precursores" e se a doutrina nacionalista foi xa esbozada por Brañas e Murguía, non hai dúbida de que foron as "Irmandades da Fala", iniciadas por Antón Vilar Ponte, en 1916, as que abriron o novo ciclo de reafirmación galega. As "Irmandades da Fala", a "Irmandade Nazonalista" e, por último, o "Partido Galeguista" (éste creado en 1931 como vangarda do galeguismo dentro da República), marcan as tres evolucións d-un mesmo movemento de liberación galega, que se caracterizou pol-a súa eficacia, tanto no terreo da política coma no da cultura. Os galeguistas celebraron asambleas memorabeis: en Lugo (1918), Sant-Iago (1919, 1932, 1933, 1934 e 1935), Vigo (1920), Monforte (1921), A Cruña (1922 e 1930) e Pontevedra (1931). Ben se pode asegurar que nunca se coordinaron as varias ideoloxías os varios esforzos e as varias ambicións de Galiza até que apareceron os "galeguistas". E a proba da súa eficacia está no Estatuto presentado ás Cortes da República.

Co dito abonda para probar que a vocación autonomista e federal de Galiza ven de moi lonxe e de moi adentro. Cicais Cataluña se pronunciase con máis potente voz dende a súa gran Barcelona, rival de Madrid; pero ningún povo do Estado hespañol marcou con tanta claridade e tanta constancia os seus anxeios políticos. O dualismo Galiza-Hespaña, dos séculos da Reconquista, non se borra doadamente, como non se borra o feito de ser a nosa Patria o berce lingoístico máis importante da península. E coa súa milenaria esperencia permítese aconsellar a Hespaña e decirlle que leva o camiño torcido.

VII

O vento *pampeiro* funga nas cordas e fai ovellas no mar,
O inverno entrou de súpeto no barco, eo pasaxe correu a cubrir